

Mahathir: 3M tetap dimulakan tahun '83

BH 10 MAR 1982

KUALA LUMPUR, Selasa — Kerajaan tidak akan membenarkan kepentingan politik setengah golongan merosakkan nasib kanak-kanak sekolah serta keharmonian di negara ini.

Oleh itu, tegas Perdana Menteri, Datuk Seri Dr. Mahathir Mohamad, Kerajaan sentiasa bersikap tegas mengenai sistem pelajaran 3M yang akan dilaksanakan sepenuhnya tahun depan.

Perdana Menteri juga berkata, Kerajaan Malaysia ialah Kerajaan campuran yang dianggotai oleh semua kaum.

"Kerajaan satu kaum tidak mungkin berkuasa di Malaysia melainkan kerjasama antara kaum yang terdapat sekarang ditamatkan, tambahnya.

Perdana Menteri, dengan nada serius

menegaskan demikian sewaktu menjawab soalan mengenai sistem 3M di Dewan Rakyat hari ini.

Sejumlah 36 soalan mengenai 3M dikemukakan dalam sidang Dewan Rakyat kali ini, dan Perdana Menteri mendapat izin

Speaker Tan Seri Syed Nasir Ismail, untuk menjawab kesemua soalan itu sekaligus hari ini.

Encik Lim Choo Hock (DAP-Ipoh), bertanya sama ada Perdana Menteri sedar bahawa Presiden MCA, Datuk Lee San Choon telah menyatakan, pelaksanaan sistem 3M

di Sekolah Rendah Cina adalah satu penghinaan bukan sahaja kepada beliau sendiri tetapi juga kepada Perdana Menteri.

Jika sedar, tegas Encik Lim, adakah Kerajaan akan menarik balik sistem 3M dari Sekolah Rendah Cina dan mengambil tindakan disiplin yang tegas kepada mereka yang bertanggungjawab bagi memperkenalkan dan melaksanakan sistem tersebut.

Perdana Menteri berkata, beliau akan menjawab kesemua 36 soalan mengenai 3M sekaligus hari ini supaya pihak yang khuatir dan bimbang dengan sistem ini dapat ditenangkan dan mereka yang mencari isu untuk kepentingan lain tidak lagi berbuat demikian.

Perkara pertama yang dihuraikan oleh Datuk Seri Dr. Mahathir ialah mengenai asas penggabalan Kurikulum 3M.

Perakuan

Katanya, ada di antara ahli-ahli yang berhormat yang meragu sama ada Kurikulum 3M ini digubal dengan persetujuan Menteri Pelajaran dan Timbalan-timbalannya atau dengan sesuka hati pegawai-pegawai kementerian sa-

Bagi ahli-ahli yang berhormat yang berkenaan dan bagi golongan masyarakat yang masih ragu, saya ingin menegaskan di sini bahawa Kurikulum 3M ini diasaskan kepada perakuan Jawatankuasa Kabinet yang ahli-ahlinya yang terdiri daripada beberapa ahli-ahli yang berhormat yang mewakili parti-parti komponen dalam Barisan Nasional, dan telahpun diterima oleh Kerajaan, tambahnya.

Perancangan Kurikulum 3M juga, katanya, dibuat dengan teliti, dan pendapat-pendapat dari semua pihak khususnya para pendidik, wakil persatuan guru, profesional, ibubapa dan wakil-wakil dari semua golongan masyarakat telah diterima dan ditimbang semasa meng-

gubal Kurikulum 3M ini.

Juga sekatan-sekatan dalam dasar pelajaran dan perlembagaan negara diambilkira.

Perkara kedua yang banyak dibangkitkan oleh beberapa ahli yang berhormat, katanya, ialah soal sama ada Kurikulum 3M akan menukar ciri, character, corak atau keperibadian Sekolah Rendah Jenis Kebangsaan (Cina) dan Sekolah Rendah Jenis Kebangsaan (Tamil).

"Sebenarnya saya kurang faham apakah yang dimaksudkan dengan istilah-istilah ciri, character, corak dan keperibadian dalam soalan-soalan yang berhormat itu.

"Setahu saya sejajar dengan perakuan dalam laporan Jawatankuasa Kabinet, sistem persekolahan peringkat rendah yang ada sekarang yang menggunakan tiga bahasa pengantar akan diteruskan.

"Ini bermakna yang sekolah kebangsaan menggunakan Bahasa Malaysia sebagai bahasa pengantar, sementara Sekolah Rendah Jenis Kebangsaan Cina menggunakan Bahasa Cina sebagai bahasa pengantar, dan Sekolah Rendah Jenis Kebangsaan Tamil menggunakan Bahasa Tamil sebagai bahasa pengantar.

Bukan sahaja mereka terus wujud, malahan masa untuk mempelajari bahasa-bahasa pengantar di sekolah-sekolah tersebut akan ditambah, melalui Kurikulum 3M ini, jelasnya.

Perdana Menteri juga menegaskan, pelaksanaan sistem 3M adalah satu perubahan kurikulum yang tidak ada kena-mengena dengan dasar pelajaran negara kita.

"Tidak ada niat dan tidak ada tindakan diambil untuk menghapuskan bahasa sesiapa.

Tuduhan ini dibuat oleh pihak tertentu mungkin pada mulanya kerana tidak faham.

"Tetapi sekarang semua pihak sudah diberi maklumat yang cukup tentang sistem 3M.